

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 5/3

3 փետրվարի 2017թ.

Քննարկվեց «Նիժֆարմ» ԲԸ հայաստանյան ներկայացուցչության գանգատը ՀՀ ԿԱ ՊԵԿ իրավաբանական վարչության պետի 08.12.2016թ. թիվ 338575/03 որոշման դեմ:

«Նիժֆարմ» ԲԸ հայաստանյան ներկայացուցչության գանգատում բերված փաստարկները.

08.12.2016թ. ՀՀ ԿԱ ՊԵԿ աշխատակազմի իրավաբանական վարչության կողմից ստացվել է վարչական իրավախախտման գործի վերաբերյալ թիվ 338575/03 որոշումը:

Գանգատաբերը խնդրում է անվավեր ճանաչել 08.12.2016թ. թիվ 338575/03 որոշումը, քանի որ «Նիժֆարմ» ԲԸ հայաստանյան ներկայացուցչությունը 2016թ. սեպտեմբեր ամսվա ընթացքում ոչ մի ներմուծում չի իրականացրել, ուստի և հարկային տեսչություն չի ներկայացրել ներմուծման հարկային հայտարարագիր և հարկերի վճարման մասին հայտարարություն:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև՝ Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ ԿԱ ՊԵԿ աշխատակազմի իրավաբանական վարչության պետը, քննելով վարչական իրավախախտման վերաբերյալ թիվ 3268 գործը և ուսումնասիրելով վարչական իրավախախտման վերաբերյալ 08.12.2016թ. թիվ 3268 արձանագրությունը պարզել է, որ «Նիժֆարմ» ԲԸ հայաստանյան ներկայացուցչության տնօրեն Աշոտ Այվազյանը «Հայաստանի Հանրապետության և Եվրասիական տնտեսական միության անդամ պետությունների միջև անուղղակի հարկերի հաշվարկման և վճարման առանձնահատկությունների մասին» ՀՀ օրենքի 8-րդ հոդվածի 1-ին կետով սահմանված ժամկետում հարկային մարմին չի ներկայացրել 2016թ. սեպտեմբեր ամսվա ներմուծման հարկային հայտարարագիրը: Նկատի ունենալով, որ արարքը նախատեսված է վարչական իրավախախտումների վերաբերյալ ՀՀ օրենսգրքի 169.1-րդ հոդվածի 2-րդ մասով, ուստի ղեկավարվելով նույն օրենսգրքի 32-րդ հոդվածի 2-րդ մասով, 244.2-րդ, 281-րդ հոդվածներով և 282-րդ հոդվածի 1-ին կետով ՀՀ ԿԱ ՊԵԿ աշխատակազմի իրավաբանական վարչության պետի կողմից 08.12.2016թ. ընդունվել է վարչական իրավախախտման գործի վերաբերյալ թիվ 338575/03 որոշումը (այսուհետ նաև՝ Որոշում), որով Աշոտ Այվազյանը ենթարկվել է վարչական պատասխանատվության՝ գումարով 20.000 դրամի չափով:

Սույն գործում առկա են 16.09.2016թ. «Նիժֆարմ» ԲԸ հայաստանյան ներկայացուցչության կողմից ԵՏՄ երկրներից ՀՀ տարածք ներմուծված բեռի ուղեկցող փաստաթղթերի լուսապատճենները: Մասնավորապես, համաձայն գործում

առկա հաշիվ-պրաֆորմայի «Նիժֆարմ» ԲԸ մայր գործարանի կողմից (հասցե՝ Ռ-7, ք.Նիժնի Նովգորոդ) «Նիժֆարմ» ԲԸ հայաստանյան ներկայացուցչությանն է ուղարկվել 6 կիլոգրամ քաշով բեռ, որի արժեքը կազմել է 20 ԱՄՆ դոլար: Նշված բեռը ՀՀ տարածք է ներմուծվել «Յումաքս» ՍՊԸ կողմից 18.09.2016թ. և հանձնվել է հասցեատիրոջը: Այսինքն, գանգատում բերված պնդումները, որ «Նիժֆարմ» ԲԸ հայաստանյան ներկայացուցչությունը 2016թ. սեպտեմբեր ամսվա ընթացքում որևէ ներմուծում չի իրականացրել, չեն համապատասխանում իրականությանը:

Վերոգրյալի կապակցությամբ հարկ է նշել, որ «Հայաստանի Հանրապետության և Եվրասիական տնտեսական միության անդամ պետությունների միջև անուղղակի հարկերի հաշվարկման և վճարման առանձնահատկությունների մասին» ՀՀ օրենքի 7-րդ հոդվածի 2-րդ մասի համաձայն. «Ներմուծվող ապրանքների համար հաշվարկված ԱԱՀ-ի և ակցիզային հարկի գումարները (բացառությամբ ակցիզային դրոշմանիշներով պարտադիր դրոշմավորման ենթակա ապրանքների համար հաշվարկված ակցիզային հարկի գումարների) Հայաստանի Հանրապետության պետական բյուջե են վճարվում մինչև ապրանքները Հայաստանի Հանրապետության տարածք փաստացի ներմուծելու (Հայաստանի Հանրապետության պետական սահմանը հատելու) օրը ընդգրկող ամսվան հաջորդող ամսվա 20-ր ներառյալ»:

Նույն օրենքի 8-րդ հոդվածի 1-ին մասի համաձայն. ««Անուղղակի հարկերի մասին» արձանագրության 20-րդ կետի կիրառության իմաստով ապրանքների ներմուծման դեպքում հարկ վճարողը պարտավոր է նույն օրենքի 7-րդ հոդվածի 2-րդ մասով սահմանված ժամկետներում իր հաշվառման վայրի հարկային մարմին ներկայացնել միայն հետևյալ փաստաթղթերը.

1) ներմուծողի լրացրած՝ ներմուծման հարկային հայտարարագիրը. »:

Քննարկվող դեպքում «Նիժֆարմ» ԲԸ հայաստանյան ներկայացուցչության տնօրեն Աշոտ Այվազյանը վարչական պատասխանատվության է ենթարկվել 2016թ. սեպտեմբեր ամսին «Նիժֆարմ» ԲԸ հայաստանյան ներկայացուցչության կողմից ԵՏՄ երկրներից ՀՀ տարածք ներմուծված բեռի ներմուծված ապրանքի համար սահմանված ժամկետում ներմուծման հարկային հայտարարագիրը չներկայացնելու համար: Այսինքն, Աշոտ Այվազյանի կողմից թույլ է տրվել զանցանք, որի համար նախատեսված է պատասխանատվություն վարչական իրավախախտումների վերաբերյալ ՀՀ օրենսգրքի 169.1-րդ հոդվածի 2-րդ մասի դրույթով:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի, «Վարչարարության հիմունքների և վարչական վարույթի մասին» ՀՀ օրենքի 49-րդ հոդվածի պահանջներով Հանձնաժողովը

ո թ ո շ ու մ է՝

ՀՀ ԿԱ ՊԵԿ իրավաբանական վարչության պետի 08.12.2016թ. թիվ 338575/03 որոշումը թողնել անփոփոխ, իսկ գանգատը՝ մերժել:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել տեսչական մարմինների միասնական բողոքարկման հանձնաժողով կամ ՀՀ վարչական դատարան:

Հանձնաժողովի նախագահ՝



Վ.ՄԻՐՈՆՅԱՆ